

畿輔通志卷一百九十五

列傳三

漢二

漢

正定府

王禹

郭昌

子況

況從兄竟

順德府

路溫舒

侯芭

張禹

祖況

父歆

韓伯高

孫威直

田豐

廣平府

毛萇

貫公

毋邱壽王

膠倉

張禹

胡常

房植

沮授

大名府

汲黯

段宏

京房

索廬放

吳祐

謝弼

秦周

宣化府

趙綰

程緒

韓珩

遵化州

郭涼

魏攸

程普

冀州

董仲舒

孟但

秦恭

顏良

文醜

趙州

尹賞

子立

孟敏

深州

竇長君

弟廣國
子彭祖

竇嬰

崔駟

高祖朝子
孫寔

寔從兄烈
烈子鈞

崔琦

定州

衛子豪

子寶元

張鈞

劉惠

張世

蘇雙

漢

正定府

王禹常山人武帝時河間獻王好儒與毛生等共採周官及諸子言樂者作樂記以傳其內史丞王定定以傳禹成帝時

禹爲謁者數言其義獻書二十四卷

漢書

郭昌藁城人光武郭皇后父也世爲郡著姓昌嘗讓田宅財

產數百萬與異母弟國人義之仕郡功曹娶正定恭王女號
郭主生后及子況未幾卒況小心謹慎年十六拜黃門侍郎
建武二年后立封況縣蠻侯恭謙下士頗得聲譽遷城門校
尉七年后廢況徙封陽安侯遷大鴻臚帝數幸其第賞賜甚
豐京師號況家爲金穴二十六年況母郭主薨帝臨喪送葬
遣使者迎昌喪與主合葬追贈昌陽安侯諡曰思二十八年
后薨帝憐之詔況子璜尙涑陽公主除爲郎顯宗卽位況與
帝舅陰識陰就並爲特進恩寵俱渥每事必均永平二年況
卒帝親自臨喪諡曰節侯子璜嗣元和三年肅宗北巡過正
定會諸郭朝見燕飲甚歡以太牢上郭主塚賜粟萬斛錢五
十萬永元初爲長樂少府子舉爲侍中兼射聲校尉舉爲大
將軍竇憲壻憲被誅舉父子遂俱下獄死家屬徙合浦況從

兄竟以騎都尉從征伐有功封新鄴侯官至東海相永平中卒子嵩嗣嵩卒追坐楚王英事國廢建初二年復封嵩子勤爲伊亭侯勤無子國除竟弟匡封發干侯官至大中大夫建武十三年卒子勳嗣勳卒子駿嗣亦坐楚王英事失國建初三年復封觀都侯卒無子國除況叔父梁早終無子其壻陳茂封南嶽侯

後漢書

順德府

路溫舒字長君鉅鹿東里人父爲里監門使溫舒牧羊溫舒取澤中蒲截以爲牒編用寫書稍習善求爲獄小吏因學律令轉爲獄吏縣中疑事皆問焉太守行縣見而異之署決曹史又受春秋通大義舉孝廉爲山邑丞坐法免復爲郡吏元鳳中廷尉以治詔獄請溫舒署奏曹掾守廷尉史宣帝卽位

溫舒上書言宜尙德緩刑其詞曰臣聞秦有十失其一尙存
治獄之吏是也秦之時羞文學好武勇賤仁義之士貴治獄
之吏正言者謂之誹謗過過者謂之妖言故虛美熏心實禍
蔽塞此乃秦之所以亡天下也方今天下賴陛下恩厚亡金
革之危飢寒之患父子夫婦勸力安家然太平未洽者獄亂
之也夫獄者天下之大命也死者不可復生鬻者不可復屬
書曰與其殺不辜甯失不經今治獄吏則不然上下相毆以
刻爲明深者獲公名平者多後患故治獄之吏皆欲人死非
憎人也自安之道在人之死是以死人之血流離於市被刑
之徒比肩而立大辟之計歲以萬數此仁聖之所以傷也太
平之未洽凡以此也夫人情安則樂生痛則思死箠楚之下
何求不得故囚人不勝痛則飾詞以視之吏治者利其然則

指道以明之上奏畏卻則鍛鍊而周內之蓋奏當之成雖咎
繇聽之猶以爲死有餘辜何則成練者衆文致之罪明也是
以獄吏專爲深刻殘賊而亡極殯爲一切不顧國患此世之
大賊也故俗語曰畫地爲獄議不入刻木爲吏期不對此皆
疾吏之風悲痛之詞也故天下之患莫深於獄敗法亂正離
親塞道莫甚乎治獄之吏此所謂一尙存者也臣聞烏鳶之
卵不毀而後鳳凰集集誹謗之罪不誅而後良言進故古人有
言山藪藏疾川澤納污瑾瑜匿惡國君含詬唯陛下除誹謗
以招切言開天下之口廣箴諫之路埽亡秦之失尊文武之
惠省法制寬刑罰以廢治獄則太平之風可興於世永履和
樂與天無極天下幸甚上善其言遷廣陽私府長內史舉溫
舒文學高第遷右扶風丞時詔書令公卿選可使匈奴者溫

舒上書願給廝養暴骨方外以盡臣節事下度遼將軍范明友太僕杜延年問狀罷歸故官久之遷臨淮太守治有異迹卒於官温舒從祖父受厯數天文以爲漢厄三七之間上封事以豫戒及王莽篡位欲章代漢之符著其語焉温舒子及孫皆至牧守大官

漢書

侯芭鉅鹿人常從揚雄居受太元法言雄卒爲起墳喪之三

年

漢書

今縣東二十五里有故居址

雍正志

張禹字伯達趙國襄國人祖父況以族姊爲光武祖母數往來南頓見光武光武爲大司馬過邯鄲況以郡吏入謁光武大喜曰乃今得我大舅乎因以爲元氏令遷涿郡太守後爲常山關長會赤眉攻關城況戰沒父歆初以報仇逃亡後仕爲淮陽相終於汲令禹性篤厚節儉父卒汲吏人賻數百萬

悉無所受又以田宅推與伯父身自寄止永平八年舉孝廉
稍遷建初中拜揚州刺史當過江行部中土民皆以江有子
胥之神難於濟涉禹厲言日子胥如有靈知吾志在理察枉
訟豈危我哉遂鼓楫而過歷行郡邑深幽之處莫不畢到親
錄囚徒多所明舉人懷喜悅元和二年轉兗州刺史亦有清
平稱三年遷下邳相徐縣北界有蒲陽坡旁多良田而墾廢
莫修禹爲開水門通引灌漑遂成熟田數百頃勸率吏民假
與種糧親自勉勞遂大收穀實鄰郡貧者歸之千餘戶室廬
相屬其下成市後歲至墾千餘頃民用溫給功曹史戴閏故
太尉掾也權動郡內有小譴禹令自致徐獄然後正其法自
長史以下莫不震肅永元六年人爲大司農拜太尉和帝甚
禮之十五年南巡祠園廟禹以太尉兼衛尉留守聞車駕當

進幸江陵以爲不宜冒險遠驛馬上諫詔報曰祠謁旣訖當南禮大江會得君奏臨漢回輿而旋及行還禹特蒙賞賜延平元年遷爲太傅錄尙書事鄧太后以殤帝初育欲令重臣居禁內乃詔禹舍宮中給帷帳牀褥大官朝夕進食五日一歸府每朝見特贊與三公絕席禹上言方諒陰密靜之時不宜依常有事於苑囿其廣成上林空地宜且以假貧民太后從之及安帝卽位數上疾乞身召遣小黃門問疾賜牛一頭酒十斛勸令就第其錢布刀劍衣物前後累至永初元年以定策功封安鄉侯食邑千二百戶與太尉徐防司空尹勤同日俱封其秋以寇賊水雨策免防勤而禹不自安上書乞骸骨更拜太尉四年新野君病皇太后車駕幸其第禹與司徒夏勤司空張敏俱上表言王者清道而後行清室而後御陛

下體烝烝之至孝親省方藥久處單外百官露止議者所不安宜且還宮上爲宗廟社稷下爲萬國子民比三上固爭乃還宮後連歲災荒府藏空虛禹上疏求入三歲租稅以助郡國稟假詔許之五年以陰陽不和策免七年卒於家使者弔

祭除小子曜爲郎中長子盛嗣

後漢書

韓伯高鉅鹿人永平時淮陽薛漢爲千乘太守伯高與犍爲

杜撫會稽澹臺敬伯從受韓詩甚知名

後漢書

孫威直鉅鹿人與郭林宗友林宗遭母憂威直往弔及門遇

林宗鄉人賈淑入門淑素性險害威直怪林宗之受其弔也

遂不入門而返林宗追謝之

後漢書

田豐字元皓鉅鹿人或云勃海人少喪親居喪甚哀及長博

覽多識名重州黨初辟太尉府舉茂才遷侍御史以閹宦用

事棄官歸家袁紹起義卑詞厚幣以招致豐豐乃應紹命官

別駕

魏志袁紹傳註

建安二年紹欲移天子自近遣使說操徙都甄

城操拒之豐乃說紹早圖許以奉迎天子紹不從五年操自

將兵征劉備於徐州豐復說紹舉軍襲其後紹以子疾辭豐

舉杖擊地曰嗟乎事去矣遭難遇之機而以嬰兒失其會惜

哉紹聞之怒遂疎之操既破劉備備奔紹紹乃進軍攻許豐

復說紹曰操既克備則許下非復空虛未可圖也今爲將軍

計不如據山河之固擁四州之衆內修農戰外結英雄然後

簡精銳爲奇兵乘虛迭出以擾河南則不及三年可坐克也

今釋廟勝之策而決成敗於一戰若不如志悔無及矣紹不

從豐固諫紹以爲沮衆遂械繫之

後漢書袁紹傳

操聞之大喜曰紹

必敗矣及紹敗衆皆拊膺而泣曰使田豐在當不至此

魏志袁紹

傳或以語豐曰君必見重豐曰袁公貌寬而內忌勝則必能

赦我今既敗吾不望生矣紹還曰吾乃為田豐所笑遂殺之

後漢書

袁紹傳

廣平府

毛萇趙人傳詩

後漢書

為河間獻王博士

漢書

即小毛公也初魯

人大毛公為詩訓詁傳於其家獻王表而出之遂以萇為博

士

鄭譜

或曰後官北海相云

張華博物志

賈公趙人受左氏訓詁於賈誼為河間獻王博士子長卿為

湯陰令以授清河張禹而復受詩於同國毛公

漢書

毋邱壽王字子贛趙人年少以善格五召待詔詔使從中大

夫董仲舒受春秋遷侍中中郎坐法免上書謝罪願養馬黃

門上不許後願守塞捍寇難復不許久之上書願擊匈奴詔

問狀壽王對良善復召爲郎稍遷會東郡盜賊起拜爲東郡都尉不復置太守後徵入爲光祿大夫侍中丞相公孫宏奏言十賊曠弩百吏不敢前禁民不得挾弓弩則盜賊執短兵短兵接則衆者勝以衆吏捕寡賊其勢必得有害無利則莫犯法刑錯之道也上下其議壽王對曰臣聞古者作五兵非以相害以禁暴討邪也安居則以制猛獸而備非常有事則以設守衛而施行陣周室衰微諸侯力政強侵弱衆暴寡海內抗倣巧詐并生是以智者陷愚勇者威怯苟以得勝爲務不顧義理於是秦兼天下廢王道立私議滅詩書而首法令去仁恩而任刑戮墮名城殺豪傑銷甲兵折鋒刃其後民以耰鉏耒耨相撻擊犯法滋衆盜賊不勝至於赭衣塞路羣盜滿山卒以亂亡故聖王務教化而省禁防知其不足恃也今

陛下昭明德建太平舉俊才興學官宇內日化方外鄉風然而盜賊猶有者郡國二千石之罪非挾弓弩之過也禮曰男子生桑弧蓬矢以舉之明示有事也孔子曰吾何執執射乎夫射之禮自天子降及庶人三代之道也詩云大侯既抗弓矢斯張射夫既同獻爾發功言貴中也愚聞聖王合射以明教矣未聞弓矢之爲禁也且所謂禁者爲盜賊之以攻奪也攻奪之罪死然而不止者大奸之於重誅固不避也臣恐邪人挾之而吏不能止良民以自備而抵法禁是擅賊威而奪民救也竊以爲大不便書奏宏詘服焉及汾陰得寶鼎羣臣皆賀曰陛下得周鼎壽王獨曰非周鼎上召而問之曰朕得周鼎獨以爲非何也有說則可無說則死對曰臣安敢無說臣聞周德始乎后稷長於公劉大於太王成於文武顯於周

公上天報應鼎爲周出故名曰周鼎今漢自高祖繼周亦昭
德顯行布恩施惠六合和同至於陛下恢廓祖業功德愈盛
天瑞畢至珍祥并見昔秦始皇出鼎於彭城而不能得天祚
有德而寶鼎自出此天之所以與漢乃漢寶非周鼎也上曰
善羣臣皆稱萬歲是日賜壽王黃金十斤後坐事誅

漢書

膠倉趙人武帝時待詔金馬門

雍正志

張禹清河人受左氏於貫長卿授尹更始與蕭望之同時爲
御史望之爲太子太傳薦禹於宣帝徵待詔未及問死

漢書

胡常字少子清河人受古文尙書於膠東庸生受穀梁春秋
於尹更始爲博士部刺史又傳左氏毛詩王莽時諸學皆立

漢書

房植清河人順帝時以將作大匠李固薦與陳留楊倫河南

尹存東平王惲陳國何臨同日徵用

後漢書李固傳

後官河南尹有

重名鄉人爲之謠曰天下規矩房伯武

後漢書黨錮傳

沮授廣平人少有大志多權略冀州牧韓馥表爲騎都尉

魏志

袁紹傳註

初平二年馥將以州讓袁紹授與長史耿武別駕閔純

諫曰冀北帶甲百萬穀支十年紹孤客窮軍譬如嬰兒在股

掌之上絕其哺乳立可餓殺奈何欲以州與之馥不從紹至

以授爲別駕尋表爲奮武將軍使監護諸將興平二年冬李

催等脅獻帝幸曹陽授說紹曰將軍累葉台輔世濟忠義今

朝廷播遷宗廟殘毀而諸州郡外託義兵內實相圖無安國

恤人之意若西迎大駕卽宮鄴都挾天子而令諸侯稽士馬

以討不庭誰能禦之紹將從其言而郭圖滔于瓊止之授復

固請言若不早定人將先我行之紹竟不從紹欲立少子尙